



宋史藝文志作四卷蓋義祖烈祖元宗後主四代
各一篇也此書敘次完善較江南野史五國故事
為勝鈔自明刻本二解謬脫 芸摺 甲辰穀雨
前一日

江南別錄

義祖徐氏諱溫烈祖之養父也剛毅寡言罕與人交眾

中凜然可畏目為徐嗔吳武王時淮南勁兵數萬號黑

雲長劔義祖為其裨將累以功遷右職與張顥同為衛

內列校吳武王疾亟召左右謀後事判官周隱曰王之

子未必能控禦諸將劉威長者必不負人可授以軍政

使待諸子長也吳武王不答顥與義祖曰王親犯矢石

而創基業安可使外人為王儻楊氏無兒有女亦可况

宋陳彭年撰

未至此吳武王曰爾能如是吾死且瞑目矣武王卒子
渥嗣立是為景王景王所為不道居父喪中掘地為室
以作音樂夜然燭擊毬燭大者十圍一燭之費數萬或
單馬出遊從者不知所詣奔走道路義祖與顥承閒泣
諫景王怒曰爾謂我不中何不殺我自為顥對曰某曾
受先王恩安敢興此心又景王親吏皆恃勢凌顥等顥
不平遂有為亂之意景王晨興視事顥擁百餘人持長
刀直進景王驚曰爾等果殺我耶顥曰非敢殺王殺王

之左右不忠良者殺數十人而止諸將非其黨者相次
被誅月餘殺景王聲言暴卒立其母弟隆演是為宣王
初顥與義祖約弑渥而以其地臣於梁至是顥欲背約自立嚴可求沮之乃止顥既得志又欲害

義祖義祖用嚴可求鍾泰章謀誅顥自為淮南行軍司
馬專軍政時藩郡守將皆武王勲舊謂為所制心不能
服宣州李遇謂人曰吾始不記有此人今日何忽乃爾
遇不自安遂反及敗良賤百口皆死自是諸將屏氣矣
李德誠為潤州東燭夜出揚州遙見謂有變立命親兵

千餘人渡江比明德誠盥漱兵已入城除德誠為江州
德誠惶怖即路帷幙皆不及取至江州懼禍未已令子
繼勳來謁義祖見之歎曰有子如此非為惡人也以女
妻繼勳移德誠於信州後數歲義祖出鎮建康以親子
知訓代知淮南軍政知訓驕暴不奉法與宣王泛舟濁
河酒酣宣王先起隨以彈丸擊之李德誠有女樂數十
人造使求之德誠報曰此等皆有所生又且年長不足
以接貴人俟求少妙者進之知訓對德誠使者曰吾殺

德誠并其妻取之亦易耳初學兵於朱瑾瑾悉心教之
後與瑾有隙夜遣壯士殺瑾瑾手刃數人埋於舍後瑾
出鎮泗州往辭知訓知訓約至瑾家為別及至瑾令妻
出見知訓方拜瑾以笏擊踏斬其首入謁宣王曰為國
去賊為民去害在今日矣時強兵皆在建鄴宣王恐事
不濟以衣障面曰此事阿舅自為勿累於我退走入內
宣王出於朱氏故舅呼瑾瑾怒曰妾子不足與語誤我
大事遂自殺烈祖自京口入代知訓掌政自是中外寧

謚時楊氏猶以東南道都統吳王承制行事義祖權柄雖重而名數猶卑遂請建國改號自為都統封齊王未幾隆演卒弟溥立是為讓王三年莊宗克梁遣使來告義祖曰沙陀自稱中興來者必詔命逆告之曰若敵國之書乃可餘則不奉命時果齋詔來使者盤桓果具驛書上聞莊宗初平大敵意務懷柔遂用敵國之禮書曰唐皇帝謹命書與吳國主吳遣司農卿盧蘋北聘李德誠自信州來朝賜宴至夕而罷是夜宣王殂宮中以德誠

進毒幽於殿內德誠親吏走告義祖以朝使不至慮有他變引親吏百餘人夜渡江斬關而入明日釋德誠立讓皇溥宣王之弟也義祖雖總大兵而身在外朝政皆遙稟烈祖居中任事徐玠數勸義祖除烈祖以次子知詢代之義祖亦知烈祖終為己害而烈祖勤於侍養又自幼畜之故不忍陳夫人於烈祖鍾愛尤切常曰我家貧賤時養此兒今日富貴負之非人理也知訓又死知詢尚少因以大政委焉及聞玠之謀深以為不宜烈祖

亦不自安求為江西義祖令知詢入覲明日詔下以知
詢為相其夕宋齊丘與術士劉通微同宿聞鼓聲通微
曰事必中變且有喪書至而義祖歿義祖晚有氣疾
歲中數發發則困躓將歿之夕氣暴作醫者進藥無效
而絕知詢自淮南奔喪翌日起為副都統威權同義祖
而知詢暗懦待諸弟不厚徐玠知其終敗輸誠於烈祖
知詢內為諸弟所構外為徐玠所賣而不知也意以已
控強兵居重地烈祖雖管大政而無兵士制之甚易義

祖喪將終遣使請烈祖至金陵烈祖上十餘表而讓皇
不允頃之知詢入朝烈祖疏其罪以讓皇之命黜為左
統軍盡奪其兵知詢面數烈祖曰先王之喪兄為人子
而不親臨喪反罪我邪烈祖曰聞爾懸劍待我我亦不
憚獨迫於君命不得往耳爾為人臣而畜乘輿物非反
而何知誨者知詢之弟娶吳功臣呂師造之女非正嫡
所出知誨常切齒因醉刺殺後頻見呂氏為崇請僧誦
經亦見之僧為陳因果呂曰吾不解此志在報冤知詢

之敗知誨有力焉烈祖德之以為江西至鎮歲餘不見
呂氏心中甚喜有家人自淮南歸於江心遇綵舟有婦
人乃呂氏也招家人曰為我謝相公善自愛我今他適
矣又以綉履授之曰恐相公不信謂爾詐此殯時物用
以為信家人至江西以履進知誨熟視之未畢呂氏已
在側曰爾謂我的不來也少時知誨卒知詢代之遇其
喪於中途撫棺而哭曰弟用心如此吾亦不怨但何以
見先王於地下聞者傷之烈祖受吳禪追上義祖尊號

徐氏諸子封拜與李氏同而知誨之後特盛子景遼景
遊皆出入宮禁預樞密專掌浮圖脩造之任當時言靈
政者以二人為首

烈祖諱昇唐之宗室也舊名知誥少孤為義祖所養有
相者謂義祖曰君相至貴且有貴子然非君家所生又
夢為人引臨大水中黃龍數十令義祖捉之義祖獲一
龍而寤明旦乃得烈祖烈祖奉義祖以孝聞嘗從義祖
征代有不如意杖而逐之及歸拜迎門外義祖驚曰爾

在此邪烈祖泣曰為人子者舍父母何適父怒而歸母子之常也義祖由是益憐惜長善書計性嚴明不可以非理犯累為樓船指揮使宋齊丘者父為江西鍾傅副使父卒羈旅淮南欲上書干謁而無紙墨行數道中有娼婦遇之問曰少年子何不樂如此齊丘以情告召歸置食贈錢數千因曰郎時至此不遣郎有所闕也齊丘感之及貴納為正室騎將姚洞天薦於烈祖烈祖竒其才與為布衣交動靜皆與之謀後烈祖除昇州刺史辟

齊丘為判官義祖出鎮建鄴改烈祖為潤州烈祖意求宣州聞命不樂宋齊丘曰今三郎政亂敗在朝夕京口去淮南隔一水若有變必先知之是天贊也三郎知訓也未幾果有朱瑾之事烈祖輕舟渡江鎮定內外以待義祖之至義祖以已子既弗克負荷用烈祖猶愈於他人因畱輔政先是知訓待烈祖甚悖每呼為乞子與諸弟夜飲遣召烈祖烈祖不至知訓怒曰不喫酒喫劔乎餘皆類此及敗知訓宅中有土室封閉甚固烈祖請義

祖開視其中絹圖義祖之形而身荷五木烈祖及諸弟
執縛如就刑之狀已被袞冕南面視朝義祖唾曰狗死
遲矣烈祖因疏其罪惡事怒遂少解死者猶數家烈祖
得政以愛民節用為本甚得當時之譽吳宣王即尊位
烈祖當相而勲舊有未登三事者烈祖不欲自尊大乃
以左僕射參政事時諸國交兵江淮為強盛烈祖增修
法度人獲乂安識者歸心焉義祖殂知詢以罪廢大政
由已矣數歲出鎮建鄴封齊王制度如義祖以長子景

通居中輔政宗齊丘王謨皆為相孫晟自中原來奔與
語大奇之引居門下徐知詢卒李建勳來歸幙府遂與
大將周宗等進禪代之議受禪之日白雀見于庭江西
楊化為李信州李生連理詔還李姓國號唐立高祖已
下七廟尊吳主為讓皇信州李德誠廬州周本皆楊氏
舊老上言吳王已遜位宜依晉魏故事降封王公出居
別邸烈祖曰曹馬之事非朕志也固請不已乃徙讓皇
於丹徒遷諸楊於泰州初吳武王諱行密謂杏為甜梅

及是復呼為杏故老有泣下者烈祖日於勤政殿視政有言事者雖徒隸必引見善揣物情人不能隱千里之外如在目前詔立齊王景為皇太子王表願寢此禮三表許之以大元帥總百揆信王景遷先娶德誠之女中興後有司以同宗姓請離之制曰南平王國之元老婚不可離信王妃可以南平為氏南平德誠所封也景遷母种氏晚歲尤承恩寵宗后罕得接見烈祖幸齊王宮遇其親理樂器大怒切責數日种氏承間言景遷之才

可代為嗣烈祖作色曰國家大計女子何預立嫁之烈祖殂宗后欲甘心數四賴元宗保全之烈祖服大丹藥發而殂大漸嚙元宗指見血曰北方有事不可忽也中書侍郎孫晟草遺詔以宗后監國翰林學士李夷鄴曰此非先旨必姦人所為大行常云婦人預政亂之本也安肯自作禍階且嗣君明德聞於天下汝曹何遽為亡國之計若遂宣行吾對百寮裂之必矣遂寢元宗即位謂夷鄴曰疾風勁草卿之謂也元宗諱璟烈祖長子也

初名景幼為義祖所器常曰諸孫中此子特貴虔州刺史鍾章恃功放恣烈祖欲繩其罪義祖曰昔無章吾已死於顛手汝曹安所托乎今日富貴章之力也背之豈人理乃令以章女配元宗義祖初見歎曰非此兒不敵此女即光穆皇后也元宗起家尚書郎吳讓皇稱之曰朕諸子皆不及也烈祖出鎮建鄴以元宗居中輔政甚得時譽烈祖即位為大元帥總百揆烈祖殂遜于諸弟詞旨堅固中書令徐玠以袞冕衣之曰大行陛下以神

器之重昇陛下陛下固守小節非所以尊先旨承孝道也乃嗣位改元保大太常博士韓熙載上疏曰踰年改元古之制也事不師古何以訓人時制書已行遂不改詔立皇弟景遂為皇太弟馮延巳自元帥掌書記為翰林學士承旨延魯自水部員外郎為中書舍人延魯急於趨進欲以功名圖重位乃興建州之役延巳曰士以文行飾身忠信事上何用行險以要祿延魯曰兄自能如此弟不能惜惜待循資宰相也始王氏政亂閩人聞

我師之至皆伐木開道壺漿奉迎既下建州軍無節制大掠數日民不堪其苦思効順者解體矣陳覺為招討使矯制進圍福州表言朝夕可剋元宗以為實令王崇文為統帥馮延魯亦往諸將爭功自相違貳崇文不能制會錢唐以兵數千來救我師不戰而潰詔鎖覺及延魯赴建鄴既至尋赦其罪始馬殷據湖南并桂管之地馬希範卒弟希廣立庶兄希萼自永州赴叅判官李恒臯知欲為變未至以為朗州節度歲餘舉兵殺希廣代

其位少弟希崇又廢希萼自立幽希萼送衡州將殺之大姓廖偃與叔匡凝以部曲數百人劫希萼於道奉為衡山王以伐希崇數日有眾萬人希崇遣使求救於我元宗命袁州刺史邊鎬督兵赴援其實襲之也時長沙童謠曰鞭打馬馬須走兵至希崇希萼皆降餘郡相次歸附乘亂取廣南桂管之地朗州劉言亦自為刺史命將軍李建期屯益陽以圖朗州將軍張巒屯零陵以圖桂州鎬以偏兵不百日而下一國四方聞之以為神鎬

性輕信自朗州至者皆陳言之忠順鎬不為備歲餘朗州土豪王逵襲殺建期進逼長沙奉言為主言不能制鎬棄城遁歸諸郡皆沒唯巒全軍而廻周師南伐進逼壽州劉彥貞督兵北征戰敗於正陽死於陣淮上方用兵錢唐乘虛圍我常州命將軍柴克宏往救常州有隋將陳仁杲祠克宏將戰夜夢仁杲曰吾遣陰兵助爾及戰有黑牛二頭衝錢唐之陣我師繼之乃大破之斬首萬餘遂解常州之圍以克宏為江州節度使冊仁杲帝

號謚武烈右僕射孫晟使周給事中王崇質為介晟至汴京謂崇質曰吾觀事勢不生還矣君家百口當別為謀乃白世宗遣崇質歸計事會鍾謨李德明亦至世宗又遣德明至建鄴盛陳世宗威德請割地求和宋齊丘深惡德明使崇質異其言乃以賣國誅德明世宗召晟責之因曰諸將圍壽州久未剋汝能降之朕赦汝罪晟至城下見劉仁贍遙呼曰君受國家旌旄臣節不可墮也且援兵至世宗大怒追至汴京斬之晟臨刑神色不

變南望再拜曰死不負陛下矣既而泗州降北諸軍繼
敗乃遣陳覺奉表割江北之地求成世宗許之遂去尊
號稱國主用周正朔太弟景遂固請歸藩立長子冀為
太子時丹徒得古銘曰天子冀州人衆以冀應之未幾
冀卒識者謂冀州趙地也陳覺乘間言社稷禍在朝暮
請陛下宴居宮中國政盡付宋齊丘以紓衆亂元宗以
戎事未寧隱忍不發鍾謨自汴京歸理德明之怨乃言
人臣窺國理不可容遂誅覺幽齊丘於青陽尋亦卒謚

醜繆謨使回為禮部侍郎任用權傾中外與信州刺史
張巒有舊巒入為天德軍使每詣謨第常屏人獨語中
夜乃止給事中唐鎬密言恐有他變宜先圖之會太子
冀葬謨固請敕巒以所部兵馬為京城巡徼元宗乃下
詔數謨侵官之罪貶於饒州縊死巒亦黜為宣州副使
元宗殂於南都南都豫章也太子即位於建鄴梓宮至
日南都羣臣表請殯於別宮後主下詔不許哭甚哀切
乃殯於萬壽殿元宗神彩精粹辭旨清暢湖南使至歸

與親友言曰爾識東朝官家南嶽真君不如也

後主諱煜字重光元宗弟五子也幼而好古為文有漢魏風母兄冀為太子性嚴忌後主獨以典籍自娛未嘗干預時政冀卒立為太子元宗幸南都後主監國於建鄴臨事明允甚得時譽元宗崩哀毀過禮即位立妃周氏為后句容尉張佖上書言為理之要詞甚激切後主手詔慰諭徵為監察御史周后疾後主朝夕臨視藥非親嘗不進衣不解帶者逾月及殂哀毀骨立柱然後起

立后妹為后王者婚禮歷代少有詔中書舍人徐鉉知制誥潘佑與禮官參議互有矛盾議久不決後令文安郡公徐遊評其是非時佑方寵用遊希旨奏佑為長月餘遊病疽鉉戲謂人曰周孔亦能為崇乎佑既居親密欲盡去舊人獨當國政後主亦惡之俄以本官專知國史佑彌不樂乃非詆公卿與戶部侍郎李平親狎上表言左右皆姦邪不誅為亂在即後主手書敦諭七表不止因請休官遠去李平初與朱元自北來元已叛去平

深厚難測後主慮其同構大姦乃暴其罪而誅之後謂左右曰吾誅佑平思之踰月不決蓋不獲已也烈祖初立庶事草創未有貢舉至元宗始議興置時韓熙載徐鉉兄弟為當代文宗繼以潘佑張洎以才名顯後主尤好儒學故江左三十年文物有貞元元和之風元宗稱臣於周惟去尊號用周正朔其諸制度猶未全改後主即位始衣紫袍王師屯漢陽鄂州楊守中以聞人心大恟乃下制貶損臺省名號竝皆改易王皆降封公遣長

第從善入貢因畱質後主天性友爱自從善不還歲時宴會皆罷惟作登高賦以見意曰原有鷓兮相從飛嗟我季兮不來歸天朝使中書舍人盧多遜來聘南伐之謀兆於此矣後主微知之遣使願受封策太祖不許甲戌歲夏梁迥來聘從容謂後主曰今冬有柴燎之禮國主當來助祭後主唯唯不荅秋初中書舍人李穆齋詔來曰朕以仲冬有事於園丘思與卿同閱犧牲後主辭以疾時大兵已在荆湖惟候穆之反命後主既不赴召

遂決進取九月舟師自大江直趨池州中外奪氣樊若
水父保大末為漢陽縣令父卒家池州累舉進士不第
至汴京上書太祖謂之有才術累遷資善大夫平南之
策多所參預時雖得池州及姑熟餘郡皆未奉命糧道
艱阻若水請於采石繫橋以利輸輓每歲大江春夏暴
漲謂之黃花水及天兵至水皆退小識者知天命為錢
唐悉兵來圍常州主將禹萬誠固守大將金成禮劫萬
誠以降而天兵已屯於建鄴城南十餘里錢唐又進圍

潤州兵初興議者以京口要害當得良將侍衛廂虞候
劉澄舊事藩邸後主尤親任之乃擢為潤州畱後臨行
謂曰卿本未合離孤孤亦難與卿別但此非卿不可勉
副孤心澄泣涕奉別歸家盡輦金玉以往謂人曰此皆
前後所賜今國家有難當散此以圖勲業後主聞之益
喜及錢唐兵初至營構未成左右請出兵掩之時澄已
懷向背堅曰兵出勝則可不勝則立為虜矣救至然後
圖戰後主又命盧絳為援絳至錢唐兵少退絳方入城

圍又合矣固守累月自相猜忌初絳怒一裨將將議殺之未決澄私謂曰盧公怒爾爾不生矣裨將泣涕請命澄因曰吾有一言告爾非徒免死且富貴因諭以降事令先出導意裨將曰柰緣某家在都城何澄曰事急矣當且為身謀我家百口亦不暇顧矣是夜裨將赴城而出明日澄徧召將卒告曰澄守數旬志不負國事勢如此須為生計諸君以為何如將卒皆發聲大哭澄懼有變亦泣曰澄受恩固深於諸君且有父母在都城寧不

知忠孝乎但力不能抗耳於是率將吏開門請降建鄴初圍後主遣使徵上江兵入援以建昌軍制置使朱贇為統將時勝兵數萬屯於湖口不進後主累促之至皖口方交戰船為天兵所圍贇自救之被執餘兵皆潰建鄴受圍經歲城中斗米十千死者相籍惟恃此救自潤州降後不聞外信出降者相繼或云贇已敗死後主猶謂不實城陷後主欲自殺左右泣涕固諫得止元宗後主皆妙於筆札好求古迹宮中圖籍萬卷鍾王墨跡尤

多城將陷謂所幸寶儀黃氏曰此皆吾寶惜城若不守爾可焚之無使散逸及城陷黃氏皆焚時乙亥歲十一月也後主至汴京二歲殂南人聞之巷哭設齋後主初即位中使趙希操自建鄴奉使江西夜宿姑熟中宵忽聞二人相語曰君自金陵來新王何以為理一曰吾聞新王以仁孝為理又曰如是則明王也又之又聞一人曰然則水木之歲當至汴梁希操心喜以後主終得中原果以乙亥歲國除入天朝後主妙於音律樂曲有念

家山親演其聲為念家山破識者知其不祥至甲戌歲有衛兵秦福自毀其鞋跣足升正殿御座論者以鞋者履也履與李同言李氏將敗此殿為秦人所得也秦趙古同姓焉後主酷好著述雜說百篇行於代時人以為可繼典論江南大臣至中朝名最顯著者徐鉉字鼎臣與弟鍇同有大名於江左方之士衡士龍烏鍇字楚金先城陷而卒著書甚多謚為文後主文集鍇為之序新說又鉉為序鉉著質論十餘篇後主宸筆冠篇儒者榮

之

江南別錄終

鈔校書籍



